



Llŷr Gruffydd AS
Cadeirydd y Pwyllgor Cyllid
Senedd Cymru
Bae Caerdydd
CF99 1NA

SeneddBusiness@Assembly.wales

02 Gorffennaf 2020

Annwyl Llŷr,

Rwyf yn ysgrifennu atoch yn rhinwedd eich swydd fel Cadeirydd y Pwyllgor Cyllid ynghylch yr amserlen ar gyfer Cyllideb 2021-22.

Yn anffodus, rydym yn wynebu amgylchiadau tebyg i'r rhai a effeithiodd ar ein paratodau ar gyfer cyllideb 2019-20. Nid ydym yn gwybod ein setliad cyllideb 2021-22 hyd yn hyn a hyd nes y cawn yr wybodaeth hon ni allwn ddarparu sicrwydd ar ein hamserlen ar gyfer ein cyllideb 2021-22 ein hunain. Ni fydd yr wybodaeth hon ar gael inni nes bydd Llywodraeth y DU yn gorffen ei Hadolygiad Cynhwysfawr o Wariant o'i gymharu â Chyllideb yr Hydref.

Yng nghyfarfod pedairochrog Gweinidog Cyllid y DU yr wythnos diwethaf roedd yr holl Weinyddiaethau Datganoledig yn pwysu am fanylion ynghylch pryd y byddai'r Adolygiad Cynhwysfawr o Wariant yn digwydd. Ers hynny, cadarnhawyd y bydd y Canghellor yn rhoi diweddariad economaidd yr haf ar 8 Gorffennaf ac mae'n bosibl y bydd hyn yn rhoi mwy o eglurder o ran pryd y bydd yr Adolygiad Cynhwysfawr o Wariant yn digwydd. Er hynny, er mwyn cydymffurfio â Rheol Sefydlog 20, rwyf wedi ysgrifennu at Gadeirydd y Pwyllgor Busnes yn nodi'r dyddiadau dangosol pryd y caiff y gyllideb ddrafft ei gosod a phryd y caiff cynnig y gyllideb flynyddol ei gyflwyno.

Croesewais eich cefnogaeth, fel rhan o lythyr 29 Mehefin oddi wrth bwyllgorau cyllid y gweinyddiaethau datganoledig at Brif Ysgrifennydd y Trysorlys ein bod unwaith eto'n wynebu lefel annerbyniol o ansicrwydd ynghylch bwriadau Llywodraeth y DU ar gyfer Adolygiad Cynhwysfawr o Wariant.

Fel y gwnaethoch gydnabod, ni wyddom eto pryd y bydd yn digwydd na'r cyfnod y bydd yn ei gwmpasu. Nid yw Llywodraeth y DU wedi nodi ychwaith pryd y bydd yn cyhoeddi ei chyllideb flynyddol yn yr Hydref. Rwyf yn croesawu hefyd eich cydnabyddiaeth bod yr ansicrwydd parhaus sy'n deillio o effaith y pandemig COVID-19 a diwedd y cyfnod pontio yn dilyn Brexit yn golygu yn anochel y byddai'r broses gyllidebol eleni yn fwy heriol i lywodraethau'r pedair gwlad ledled y DU. Byddwn yn cytuno, am y rhesymau hyn, ei bod yn

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1NA

Correspondence.Rebecca.Evans@gov.wales
Gohebiaeth.Rebecca.Evans@llyw.cymru

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

heriol i mi roi sicrwydd ar hyn o bryd o ran y dyddiadau y byddwn yn cyhoeddi cyllideb ddrafft a chyllideb derfynol 2021-22 Llywodraeth Cymru.

Mae Rheol Sefydlog 20.6 yn gwneud darpariaeth i'r Pwyllgor wneud newidiadau i'r amserlen ar gais y Llywodraeth. Yn amodol ar hyn, ac ar y ddealltwriaeth y byddaf yn darparu amserlen bendant cyn gynted â phosibl ar ôl i Lywodraeth y DU wneud cyhoeddiad ynghylch yr Adolygiad o Wariant a'i Chyllideb, rwyf wedi dweud wrth y Pwyllgor Busnes ein bod yn bwriadu cyhoeddi'r Gyllideb amlinellol a'r gyllideb ddrafft fanwl gyda'i gilydd ar 8 Rhagfyr, a'r gyllideb derfynol ar 2 Mawrth 2021, yn amodol ar y blaengynllun y cytunir arno ar gyfer cyfarfodydd llawn y Senedd.

Wrth gynnig y dyddiadau hyn rwyf yn ymwybodol o Reol Sefydlog 20.5 a'r trefniadau y cytunwyd arnynt rhwng Llywodraeth Cymru a Senedd Cymru o ran y cyfnod a ddarperir ar gyfer craffu. Mae Rheol Sefydlog 20.5 yn darparu, mewn amgylchiadau 'arferol', i'r Pwyllgor Cyllid gael 8 wythnos i gyflwyno adroddiad ar gynigion y gyllideb amlinellol a phum wythnos i'r pwyllgorau ystyried cynigion manwl y gyllideb. Er nad oes modd galw hyn yn flwyddyn 'arferol' a bod llawer o'r amgylchiadau yn debyg i'r rhai a wynebwyd gennym gyda'n gilydd yn 2019, rwyf wedi ymrwymo o hyd i sicrhau'r gwaith craffu llawnaf posibl ar ein cynigion gwariant. O ganlyniad, byddai'r amserlen yr wyf wedi'i nodi yn caniatáu 8 wythnos ar gyfer craffu ar y gyllideb ddrafft, gan gynnwys 5 wythnos eistedd a 3 wythnos pan nad ydym yn eistedd.

Efallai y bydd datganiad y Canghellor ar 8 Gorffennaf yn rhoi sicrwydd cynnar. Os bydd gennym ddealltwriaeth gadarn yr wythnos nesaf byddwn yn falch o ddarparu'r wybodaeth ddiweddaraf cyn toriad yr haf.

Os na fydd hyn yn digwydd, unwaith y cawn sicrwydd, byddwn yn ailedrych ar ein cynlluniau ac yn ysgrifennu eto i gadarnhau ein bwriadau, a byddem yn ceisio cyflwyno ein cynlluniau a chyhoeddi'r gyllideb yn gynharach os bydd amserlen Llywodraeth y DU yn gwneud hyn yn bosibl. Fy mwriad hefyd fyddai sicrhau'r gyfran fwyaf posibl o'r wythnosau eistedd a ddarperir ar gyfer craffu ar y gyllideb ddrafft.

Rwyf yn ddiolchgar unwaith eto am ddealltwriaeth y pwyllgor ac yn gobeithio bod y trefniadau hyn yn dderbyniol, o gofio'r amgylchiadau, sy'n cael eu gyrru gan ffactorau allanol y tu hwnt i'n rheolaeth uniongyrchol ac sydd â lefel ddigynsail o ansicrwydd.

Yn gywir,



Rebecca Evans AS/MS
Y Gweinidog Cyllid a'r Trefnydd
Minister for Finance and Trefnydd